

ՀԱՅ ՆԱԽԱՐԱՐՆԵՐԻ ԴԻՐՔՈՐՈՇՈՒՄԸ ԱՐԱԲԱԿԱՆ ԱՌԱՋԻՆ
ԱՐՇԱՎԱՆՔՆԵՐԻ ԺԱՄԱՆԱԿ

ՎՐԵՑ ՎԱՐԴԱՆՅԱՆ

640-ական թվականներին իսլամի ահազնածավալ հորձանքը սպառնում էր Արևելքի քրիստոնյաներին, առաջին հերթին, իհարկե, հայերին և Բյուզանդիայի սահմաններում ապրող մյուս ժողովուրդներին: Այդ սպառնալիքը վտանգավոր ձևեր ընդունեց հատկապես Սասանյան Պարսկաստանի անկումից հետո, երբ արաբներն իրենց բոլոր ուժերը նետեցին Հայաստանի ու Բյուզանդիայի դեմ: Հերակլիոսի (610-641) կայսրության վերջին տարիներին արդեն արաբներն սկսեցին իրենց հարձակումներով սասանել Բյուզանդիան: Այդ սպառնալիքին հաջողությամբ դիմագրավելու հույսով կայսրը լայնախոհ քաղաքականությամբ ջանում էր իր կողմը գրավել նաև պարսկական բաժնի հայ նախարարներին: Տվյալ իրավիճակում հող ստեղծվեց երկու հավատակից երկրների ռազմաքաղաքական դաշինքի համար: Կայսրը Բյուզանդիայի հայկական հատվածին շնորհեց ինքնավարություն, այնտեղ կառավարիչ նշանակելով Մթեթ Գնունուն: Վերջինս պետք է ջանար իր իշխանությունը տարածել նաև Հայաստանի պարսկական մասում, որտեղ դեռևս Կավատ II արքայի կողմից մարզպան էր կարգվել Վարազտիրոց Բագրատունին՝ Սմբատի (Նոսրով Շումի) որդին¹:

Սասանյան Պարսկաստանի փլուզումից հետո հայ նախարարները ջանում էին Հայաստանի շահերից բխող քաղաքականություն վարել: Ատրպատականի անմատույց շրջաններում դեռևս իր անկախությունը պահպանած Մարաց իշխանը փորձեց հնազանդեցնել Վարազտիրոցին: Մյուս կողմից Մթեթն էր ջանում իր իշխանությանը ենթարկել Վարազտիրոցին, որին մեկուսացնելու համար նա չխորչեց Մարաց իշխանի օժանդակությունից: Սակայն դա նրանց չհաջողվեց՝ շնորհիվ Վարազտիրոցի ճկուն գործելակերպի: Վերջինս ուղղակի կապերի մեջ մտավ Հերակլիոսի հետ՝ ճանաչելով նրա գերիշխանությունը: Սակայն կայսրն իր դեմ նյութված դավադրությանը մասնակցելու մեղադրանքով Վարազտիրոցին աքսորեց Հյուսիսային Աֆրիկա², որտեղ նա հավանաբար պետք էր կայսրության թշնամիների դեմ մարտնչելու համար: Դավադրության բացահայտումը և նրա մասնակիցներին պատժելը տեղի է ունեցել 638 թ. հուլիսից հետո³, հետևաբար, Վարազտիրոցը պետք է աքսորված լիներ այդ թվականին:

1 Պատմություն Սերգեյուսի, աշխ. Գ. Աբգարյանի. Երևան, 1979, էջ 128-129:

2 Նույն տեղում, էջ 133:

3 И. О р б е л и. Избранные труды. Ереван, 1963, с. 399.

Նույն տարում Հերակլիոսը Դավիթ Սահառունուն նշանակեց իշխանաց իշխան՝ «ի վերայ ամենայն աշխարհացն», գրում է Սեբեոսը, նշելով նաև, որ նա իշխեց «ամս Գ»⁴: Հետևաբար, Դավիթ Սահառունին Հայաստանի կառավարչի պաշտոնը վարել է 638-641 թթ: Մրենի եկեղեցու որմին արձանագրված է, որ նրա կառուցումն ավարտվել է «ամուոյն քսան և իններորդի Հերակլի ... յիշխանութեան Դաւթի ամենադով պատրկի կուրապաղատի և սպարապետի Հայոց և Ասորւոց...»⁵: Արձանագրությունից երևում է, որ այն փորագրվել է Հերակլիոս կայսեր դահակալման 29-րդ տարում, իմա՝ 639 թ.: Դավիթ Սահառունին ջանում էր կենսադործել կայսեր քաղաքա՝ սն նպատակները Հայաստանում: Հերակլիոսը, հավաստում է Սեբեոսը, «Հաստատէ զնա (Դավիթ Սահառունուն – Վ. Վ.) ի ծառայութիւն իւր», սա, այն հայ նախարարները չհանդուրժեցին կայսեր դրածոյին և վերջինս «անարգեալ ի գաւրացն հալածեցաւ»⁶:

Արաբական արշավանքների վտանգը հրամայաբար պահանջում էր իսլամի դեմ համախմբել Բյուզանդիայի և Հայաստանի ուժերը: Քաղաքական այս հետնախորքի վրա առավել կարևորվեց հայ նախարարների հանդեպ Հերակլիոս կայսեր սիրաշահող քաղաքականությունը, որը շարունակվեց նաև նրա հաջորդի օրոք: Հերակլիոսի գահակալման վերջին տարում արաբները թափանցեցին նաև Հայաստան: Համաձայն Սեբեոսի վկայության, արաբներն առաջին անգամ Հայաստան ներխուժեցին եզր կաթողիկոսի մահվան և Ներսես Գ-ի աթոռակալության առաջին տարում⁷, որն ընկնում է 641 թ.⁸: «Պատմութիւն սրբոյն Ներսիսի և գիւտ նշխարաց» գրվածքում նշվում է, որ դեպի Հայաստան արաբական առաջին արշավանքը տևել է ունեցել Հայոց 88 թվականին⁹, որը համապատասխանում է 640 թվականին¹⁰:

Արաբ մատենագիրների երկերում պարունակված տեղեկությունները հիմնականում համընկնում են հայկական սկզբնաղբյուրների ընձեռած տվյալներին: Ըստ Բելաղուրիի, արաբներն առաջին անգամ Հայաստան են արշավել Հիջրի 19-ին և 20-ի Մուհամմադ ամսին (իմա՝ 640 թվականից մինչև 641 թ. հունվարն ընդգրկող ժամանակամիջոցը)¹¹: Թաբարին և Իբն ալ-Ասիրը Հայաստան կատարած առաջին ներխուժման թվական են համարում 640-ը¹²:

Սեբեոսի հաղորդման համաձայն, Հայաստան կատարած առաջին արշավանքի ժամանակ արաբները Միջագետքից Չորասլահակ լեռնանցքով խուժեցին Տարոն, ապա գրավեցին նաև Բզնունիքն ու Աղիովիտը, որից

4 Ս ե բ ե ո ս, էջ 133-134:

5 И. О р б е л и. Указ. соч., с. 401.

6 Ս ե բ ե ո ս, էջ 133-134:

7 Նույն տեղում, էջ 138-139:

8 Մ. Օրմանյան. Հայոց եկեղեցին. Երևան, 1993, էջ 66, 252:

9 Սոփերք հայկականք. հ. է, Վենետիկ, 1843, էջ 43-44:

10 Հ. Մ և ն ա ն գ յ ա ն. Երկեր. հ. Բ, Երևան, 1978, էջ 509-510:

11 B a l a d h u r i. The origins of the Islamic State, I, New York, 1916, p. 275.

12 Արաբացի մատենագրեր Հայաստանի մասին. թարգմ. Բ. Խալաթեանց. Վիեննա, 1919, էջ 80: Արաբական աղբյուրներ Բ, Իբն ալ-Ասիր, թարգմ. առաջաբան և ծան. Ա. Տեր-Ղևոնդյանի. Երևան, 1981, էջ 45:

հետո Բերկրիի ձորով մտան Կոգովիտ: Շարունակելով հարձակումը, նրանք հասան Դվին մայրաքաղաք և պաշարեցին այն¹³:

Բելագուրին նշում է, որ արարական Իյազ գորապետը Միջագետքից ներխուժեց Աղձնիք և գրավեց նրա Արզն (Աղձն) գավառի համանուն կենտրոնը¹⁴: Իրն ալ-Ասիրը Չորրորդ Հայքի դրավումը դնում է Պաղեստինի և Կեսարիայի նվաճումից առաջ: Պաղեստինը արարները գրավել են 638 թ., Կեսարիան՝ 640 թ.¹⁵: Ըստ այդմ արարներն առաջին հերթին թափանցել են Չորրորդ Հայք, նկատի առնելով նրա ռազմավարական կարևոր նշանակությունը Բյուզանդիայի դեմ մղվող պատերազմներում: Արզնը գրավելուց հետո, համաձայն Բելագուրիի հաղորդման, Իյազը «Հասավ Բիթլիս, ապա ժամանեց Խլաթ, որի պատրիկը նրա հետ պայմանագիր կնքեց: Ապա նա հասավ Ալ-այն ալ-Համիդա («Աղի ջրեր»)»¹⁶, որ Հայաստանում է, բայց չսպառնաց նրան, իսկ երբ ետ դարձավ, Բիթլիսի սահիբի վրա դրեց Խլաթի խարաջի գանձման պատասխանատվությունը»¹⁷:

Բիթլիսից մինչև Խլաթ Իյազը պետք է անցներ Բզնունիք և Աղիո-վիտ դավառներով, ինչը վկայված է նաև Սեբեոսի մոտ¹⁸: Ըստ Բելագուրիի, Իյազ գորապետի՝ Հայաստան կատարած արշավանքի վերջնագիծը Բիթլիս-Խլաթ-Աղի ջրեր ռազմուղին էր: Փաստորեն դրանով ավարտվեց Իյազի արշավանքը, որից հետո նա վախճանվեց: Բելագուրին Իյազի մահը դնում է Հիջրի 20 թ., իմա՝ 640 թ. դեկտեմբերին կամ 641-ի սկզբին: Սակայն ժամանակամերձ, հետևաբար, ավելի արժանահավատ Սեբեոսն ու Ղևոնդը հավաստում են, որ արաբական առաջին արշավանքների ժամանակ ասպատակվել, ավարտություն ու կոտորածի են մատնվել նաև Այրարատն ու այլ երկրամասեր: Հարկավ, արաբների նպատակն էր բովանդակ Հայաստանի ու կովկասյան մյուս երկրների նվաճումը, ուստի անբնական կլիներ, որ նրանք կես ճանապարհին ետ քաշեին իրենց ուժերը: Առանց Հայաստանի սիրտը թափանցելու, նրա քաղաքական ու կրոնական կենտրոն Դվինը գրավելու, արարները չէին կարող նվաճված համարել այդ երկիրը: Ավելին. Հայաստանի նվաճումը գյուրացնելու էր նրանց հետագա դործողությունները կովկասյան երկրաշրջաններում: Արաբները նույնիսկ փորձեցին օգտագործել որոշ հայ նախարարների իրենց արշավանքների ժամանակ: Մոկաց իշխան Վաղդիկը օժանդակեց արաբ գորայիններին՝ Այ-

13 Ս ե բ ե ո ս, էջ 138:

14 В а л а д һ у р и, I, p. 275.

15 Е. Б е л я е в. Арабы, ислам и Арабский халифат в раннее средневековье. М., 1966, с. 138.

16 Նույնացվում է Վարչակի ջերմուկի հետ (տե՛ս է. Լ. Դ ա ն ի ե լ յ ա ն. Հայաստանի քաղաքական պատմությունը և Հայ առաքելական եկեղեցին (VI-VII դարեր). Երևան, 2000, էջ 157): Այդ դեպքում հարկ է ընդունել, որ Իյազի գործը հասել է Այրարատ, քանի որ Վարչակի ջերմուկը Այրարատի Մաղկոտն գավառում էր: Ավելի հավանական է այդ վայրը փնտրել Աղիովիտ գավառում, որը տարածվում էր Վանա լճի Հյուսիսային ափերին: Պետք է կարծել, որ Իյազի գործը չի հեռացել Վանա լճի ափամերձ տարածքներից և Աղիովիտով շարժվել է դեպի Հյուսիս-արևելք. գուցե կամենալով գրավել նաև Արձնը: Հասնելով գավառի ծծմբաղբյուրներին, այն ետ է վերադարձել (ծծմբային այս ջերմուկները հիշվում են նաև նոր ժամանակներում: Տե՛ս Ա - Դ օ. Վանի, Բիթլիսի և Էրզրումի վիլայեթները. Երևան, 1912, էջ 37):

17 В а л а д һ у р и, I, p. 275.

18 Ս ե բ ե ո ս, էջ 138:

րարատ թափանցելու¹⁹ (այս իշխանին հիշում է նաև արաբ հեղինակ Ալ-Վակիդին (748-823)՝ Վարաբեկ անունով, որն, անշուշտ, Վարդիկի արաբական ձևն է): Վարտաբեկը գործակցում էր Հայաստան արշաված արաբական զորականների հետ²⁰: Հայտնի է, որ արաբներին զորակցում էր նաև Անձևացյաց իշխան Սահուռը²¹:

Վարդիկ Մոկացու օգնությամբ անցնելով Մեծամորը, արաբական զորքը ասպատակելով «գամենայն երկիրն, և ժողովեալ գաւար և գգերութիւն բազում յոյժ», բանակեց խոսրովակերտ անտառի եզրին: Այնուհետև հնդորյա գաղարից հետո արաբները, ըստ Սեբեոսի հազորգման, «գիմեցին ի վերայ քաղաքին. մատնեցաւ քաղաքն ի ձեռն նոցա... եւ դիմեալ ի ներքս գաւրք թշնամեացն՝ սատակեցին սրով գբազմութիւն քաղաքին և առեալ գաւար և զկապուտ քաղաքին ելին և բանակեցան ի նմին բանակատեղն, որ աւր ի էր տրէ ամսոյն, յաւուր ուրբաթի»²²: Պատմագրի վկայության համաձայն, արաբները Դվինը գրավեցին Հերակլիոս կայսեր մահվանից հետո, եզր կաթողիկոսի դահակալության վերջին տարում, երբ «յաջորդեցաւ ի նմին ամի յաթոռ կաթողիկոսութեան փոխանակ եզրի կաթողիկոսի»²³: Ինչպես տեսնում ենք, Դվինի դրավումը դրվում է եզրի աթոռակալության վերջին և Ներսես Շինոզի կաթողիկոսության առաջին տարում, այսինքն 641 թ.: Քաղաքի դրավումը մեկ տարով ավելի ուշ է նշված Ղևոնդի, Անանուն ժամանակագրի և Ասողիկի մոտ: Դվինի դրավման տարբեր թվականներ են նշված ուրիշ հեղինակների երկերում²⁴: Ասորի պատմագիր Դիոնիսիոս Տելմահրեցու վկայությունները համընկնում են Սեբեոսի հազորգած տեղեկության հետ: Նա նույնպես Դվինի դրավումը դնում է 641 թվականին, նշելով նաև սրի քաղված դվինցիների թիվը (12 հազար)²⁵: Այդպիսի վերաբերմունքը, անշուշտ, հետևանք էր դվինցիների դիմադրության: Արաբները նման դեպքերում դաժան վերաբերմունք էին ցուցաբերում պարտվածների հանդեպ²⁶:

Բելաղուրին Իյադին ենթակա զորապետ է հիշում Հաբիբ իբն Մասլամային, որը նրա հրամանով դեռևս 640 թ. արշավեց Սամոսատ և այլուր²⁷: Այս արշավանքի ժամանակ այդ զորապետը փաստորեն չի մասնակ-

19 Նույն տեղում:

20 N. A d o n t z. Les fonds historiques de l'épopée Byzantine Digenis Akritas ("Études arméno byzantines", Lisbonne, 1965, p. 30).

21 Յ ո վ հ ա ն Մ ա մ ի կ ո ն ե ն ն. Պատմութիւն Տարօնոյ, աշխ. Ա. Աբրահամյանի. Երևան, 1941, էջ 285-286:

22 Է. Դանիելյանը, հենվելով Բելագուրիի և Իբն ալ-Ասիրի տեղեկությունների վրա, կարծում է, որ «Հայաստանում կատարած առաջին, երկրորդ և երրորդ արշավանքների ժամանակ արաբները Դվին չէին հասել» (տես է. Դ ա ն ի ե լ յ ա ն. նշվ. աշխ., էջ 157): Սակայն Սեբեոսի վկայությունը չպետք է աչքաթող անել, քանի որ ժամանակակից է կատարված անցքերին և ավելի լավ դիտե Հայաստանը, քան ժամանակով մի քանի դար հետո ապրած արաբ հեղինակները: Բելագուրիի և Իբն ալ-Ասիրը նկատի ունեն սոսկ Իյադի զորաբաժինը, մինչդեռ Հայաստան թափանցած արաբական զորախումբն ուներ նաև այլ զորամասեր, որոնք, ինչպես տեսանք, ասպատակեցին Հայաստանի նաև մյուս շրջանները:

23 Տե՛ս Ս ե բ ե ո ս, էջ 139:

24 Մանրամասն տես Ն. Մ ա ն ա ն դ յ ա ն. Երկեր, հ. Բ, էջ 513-519:

25 Chronique de Denis de Tell Mahre, publ. et trad. par J. Chabot. Paris, 1895, p. 6.

26 A b o u J o u s o f J a k o u b. Le Livre de l'impôt foncier ("Kitab el-Kharadj"), trad. et annoté par E. Fagnan. Paris, 1921, p. 89; B a l a d h u r i, I, p. 104.

27 B a l a d h u r i, I, p. 272-273.

ցել Իյադի Հայաստան կատարած արշավանքին: Սակայն ինչպես հավաստում է Բելագուրին, երբ Օսմանը դարձավ խալիֆա, «Ասորիքի, Միջագետքի և նրանց սահմանակից քաղաքների իր կուսակալ Մուսավիային հրամայեց, որպեսզի Հաբիբ իբն-Մասլամային ուղարկի Հայաստան: Հաբիբը մոտ ութ հազարանոց զորքով Ասորիքից ու Միջագետքից շարժվեց դեպի Հայաստան և հասնելով Կալիկալա (Կարին), բանակեց այնտեղ»²⁸: Յակուբին հիշում է, որ «Հաբիբ իբն-Մասլաման նվաճեց Հայաստանի մի մասը»²⁹: Օսման խալիֆան դահակալել է 644 թվականից, ուստի Հաբիբի արշավանքը Հայաստան այդ թվականից շուտ էլ կարող տեղի ունենալ: Տարբեր էին նաև Իյադի և Հաբիբի զորքերի արշավուղիները: Իյադի ռազմուղին, ինչպես տեսանք, ձգվում էր Մծբին-Արղն-Բաղեշ-Խլաթ ուղղությամբ, մինչդեռ Հաբիբի զորքը շարժվեց Միջագետք-Կարին արշավագծով:

Հայ և օտար մատենագիրների վկայությունները թույլ են տալիս ենթադրելու, որ արաբները Դվինը գրավել են թե՛ 641 թ. և թե՛ 650 թ. սկզբներին³⁰: Դա միանգամայն հնարավոր էր, քանի որ 641 թ. արաբները չհաստատվեցին Հայաստանում, ուստի կայազոր չթողեցին Դվինում: Այդ պատճառով նրանք հաջորդ արշավանքի ժամանակ վերստին պետք է գրավեին այդ քաղաքը: Արաբներն իրենց առաջին արշավանքների ժամանակ տիրացան Հայաստանի պարսկական մասին, որտեղ Հայոց զորապետն էր Թեոդորոս Ռշտունին: Վերջինս ուներ պարսկական կողմնորոշում և դիմադիր դիրքավորում արաբ նվաճողների հանդեպ: Նա ամրացավ Աղթամար կղզում, որտեղ շինարարություն կատարեց (հավանաբար պաշտպանական բնույթի) և կարողացավ ետ վանել տարբեր հրոսախմբերի հարածամյա հարձակումները³¹: Նման իրավիճակում ո՛չ Թեոդորոս Ռշտունին և ո՛չ էլ նախարարներից որևէ մեկն ի գործ էլք միաբանել Հայաստանի իշխաններին և երկրում հաստատել միասնական իշխանապետություն: Ճիշտ է, տվյալ պահին հարևան գործը պետությունները չէին տնօրինում Հայաստանի քաղաքական ճակատագիրը, սակայն հայ նախարարները գերադասեցին ամրապնդել իրենց ենթակա գավառներում ունեցած իշխանությունը և չճանաչեցին Թեոդորոս Ռշտունու գերակայությունը: Սերեոսը գրում է, որ Հերակլիոս կայսեր վախճանվելուց հետո «ոչ ոք ընտրեցաւ զաւրավար յաշխարհին Հայոց, քանզի անմիաբան լեալ իշխանացն մեկնեցան ի միմեանց»³²: Այդուհանդերձ Թեոդորոս Ռշտունին փորձեց դիմադրություն ցույց տալ արաբներին, որոնց ներխուժումը կանխելու համար, ըստ որոշ ուսումնասիրողների, նա մեկնեց Նախճավան, սպասելով թշնամուն այդ

28 Նույն տեղում, էջ 315–316:

29 Из соч. Якуби "История", текст и перевод П. Жузе. Баку, 1927, с. 5.

30 Հմմտ. Թեոփանես Խոստովանող. Ժամանակագրություն. Թարգմ., առաջաբան և ծանոթագրություններ Հր. Բարթիկյանի. Երևան, 1983, էջ 56, 252, ծան. 336: Դվինը երկրորդ անգամ արաբների կողմից գրավվել է Համբարյանը գնում է 654թ. (տե՛ս Հ. Համբարյան. Հայք արաբացվող իշխանության տակ. Ժամանակագրական խնդիրներ Սեբեոսին. – «Հուշարձան», Վիեննա, 1911, էջ 246):

31 Սեբեոս, էջ 134:

32 Նույն տեղում, էջ 138:

կողմերից³³: Այս մասին Սեբեոսը գրում է. «Արք երեք յիշխանացն, որք երթային ժողովել զգաւրն Ճապաղական, Թէոդորոս Վահևունի, և Խաչեան Առաւելեան, և Շապուհ Ամատունի: Որք զնացեալ փախստական ի Դուլին... Բայց Թեոդորոսն զնացեալ ի Նախճաւան քաղաք»³⁴: Այստեղ պատմադիրը նկատի ունի ոչ թե Թեոդորոս Ռշտունուն, այլ Թեոդորոս Վահևունուն: Նկատենք, որ Սեբեոսը առաջինին միշտ հիշում է որևէ վերադիրով. «Թեոդորոս Ռշտունեաց տէր» (11 անգամ), «Ռշտունեաց տեսառն» (4 անգամ) կամ պարզապէս «Թէոդորոս Ռշտունի» (3 անգամ), «Զաւրավարն Հայոց Թեոդորոս» (2 անգամ) ձևերով. բայց երբեք չի հիշատակում լոկ «Թէոդորոս» անունով: Մինչդեռ մեջբերված վկայության մեջ «Թեոդորոս» անունը առանց վերադիրի է: Ըստ երևույթին այդպեղ պատմադիրն ի նկատի ունի Թեոդորոս Վահևունուն, որին, ինչպէս տեսանք նույն մեջբերման մեջ, նա արդեն հիշել էր տոհմանունով, ուստի երկրորդ անգամ հիշելիս հարկ չի համարել այն կրկնել: Ըստ երևույթին Թեոդորոս Վահևունին Դվինից հեռացել է Նախճավան՝ Սյունիք անցնելու և այնտեղ իբ տիրույթները պաշտպանելու նպատակով: Հետագայում ևս, ինչպէս վկայում է Սեբեոսը, Թեոդորոս Վահևունին Թեոդորոս Ռշտունու հրամանով մեկնում է Սյունիք (Վայոց ձոր), գրավում Արփայք (Արփայս) բերդը, որտեղ գտնվում էին «ամենայն գանձքն աշխարհին, եկեղեցւոյ և իշխանաց և վաճառականաց»³⁵:

Արաբական այս արշավանքների ժամանակ Հայ նախարարները չկարողացան միավորել իրենց ուժերը և դիմակայել ոսոխին: Նրանք նաև միատեսակ դիրքորոշում չունեցան արաբների հանդեպ: Նախարարների մի մասը, ինչպէս տեսանք, պայմանագրեր կնքեց արաբ զորավարի հետ, մյուսները ըմբոստ վերաբերմունք ցուցաբերեցին, որից խիստ տուժեցին հատկապէս Դվինի բնակիչները: Թեոդորոս Ռշտունին իր սակավաթիվ զորուժով դարանամուտ եղավ Կողովիտում և հարձակվեց արաբների վրա, բայց ուժերն անհավասար էին, ուստի նա «ոչ կարաց զդէմ ունել նոցա. փախստական լինի առաջի նոցա»³⁶: Այս փաստը վկայում է, որ Թեոդորոս Ռշտունին պայմանագիր չէր կնքել արաբների հետ և տակավին հակադիր գիրքավորում ուներ նվաճողների նկատմամբ:

Թեոդորոս Ռշտունու հակաարաբական գործելակերպն աննկատ չմնաց Բյուզանդիայում: Վերը նշված ընդհարումից անմիջապէս հետո «ի կայսերէ հրաման հասեալ զաւրավարութեանն Թէոդորոսի Ռշտունեաց տեսառն՝ հանդերձ պատրկութեան պատուով»³⁷: Կոստաս II կայսրը հուլիս ուներ Հայ նախարարներին համախմբել ընդդեմ արաբների: Բայց այն փաստը, որ նախարարների մի մասն ընդունել էր արաբների դերիշխանութիւնը, ի դերև էր հանում այդ ուղղությամբ կայսեր ջանքերը: Մյուս

33 Տե՛ս Ղ. Ա լ ի շ ա ն. Այրարատ. Վենետիկ, 1890, էջ 495, ծան. 1: Ս տ. Մ ե - լ ի ք - Բ ա խ շ յ ա ն. Հայաստանի VII-IX դարերում. Երևան, 1968, էջ 37, A. T e p - Γ e v o n d y a n. Армения и Арабский халифат. Ереван, 1977, с. 24-25. Է. Դ ա ն ի ե լ յ ա ն. Նշվ. աշխ., էջ 160:

34 Ս ե բ ե ո ս, էջ 138:

35 Նույն տեղում, էջ 166:

36 Նույն տեղում, էջ 138-139:

37 Նույն տեղում, էջ 139:

նախարարներին իր կողմը գրավելու համար անհրաժեշտ էր բյուզանդական զորք մտցնել Հայաստան, քանի դեռ այնտեղ չէին հաստատվել արաբները: Կայսրը Պռոկոպոս զորապետի դիվանագիտական թղթերով հարձակմամբ հասան Բատնա-Սառուգ, ավերեցին ու կողոպտեցին այդ քաղաքը, վերցրեցին իրենց ցանկացածը և վերադարձան իրենց երկիրը»: Պատմադիրն այդ անցքը դնում է հունաց 955 (643/644) թվականին³⁸: Իրականում այն տեղի է ունեցել մեկ տարի առաջ՝ 642/643 թվականին³⁹: Սակայն ինչպես վկայված է Ղևոնդի երկում, Պռոկոպոսի և Թեոդորոս Ռիտունու դաշինքը քակտվեց: Դրան հետևեց Մարդուցայքում բյուզանդական 60 հազարանոց բանակի պարտությունը, որը տեղի ունեցավ «ի քսան և երկրորդ ամի Աբու Բաքրայ և Օթմանայ և Ամրի»⁴⁰, իմա՝ 642/643 թ.: Հետևաբար, Բատնա-Սառուգի վրա հայ-բյուզանդական զորուժի հարձակմանն ի պատասխան արաբները հարձակվել են բյուզանդական զորքի վրա՝ պարտության մատնելով նրան:

Ենթադրվում է, որ հայ նախարարների միավորիչ գործողությունները խոչընդոտվում էին Բյուզանդիայի կողմից⁴¹: Սակայն արաբական սպառնալիքները դամոկլյան սրի պես կախված էին կայսրության դիվան, ուստի վերջինս կարիք ուներ քրիստոնյա գաղնակիցների: Տվյալ պահին դինադաշինքի համար քաղաքական բարենպաստ պայմաններն առկա էին Հայաստանում, քանի որ նրան ևս սպառնում էին արաբները: Սասանյանների անկումից հետո Բյուզանդիան, ինչպես վերը նշվեց, ջանում էր իր ազդեցությունը ենթարկել նաև Հայաստանի մյուս բաժինը, որպեսզի այն չընկնեք նոր և ահարկու ախոյանի դերիշխանություն տակ, ինչը ճակատագրական կլինեք կայսրության համար: Բնականաբար, այդ նպատակի իրադրոժման երաշխիքն առաջին հերթին հայ նախարարների միասնությունը և կայսրության հետ համագաղն գործողություններն էին: Միայն այդ պարագայում նախարարներն ի գորու կլինեին պատկառազու ուժ հանել ընդդեմ արաբների և ապահովել կայսրության անվտանգությունն Արևելքում: Հայ նախարարներին իր կողմը գրավելու նպատակով Բյուզանդիայի կայսրն առատորեն պատիվներ ու պաշտոններ էր շնորհում նրանց ջանալով օգտադրոժել հայերի ուժերը արաբների դեմ: Կայսրը Վարազատիրոց Բադրաաունուն ազատ արձակեց և բարձր պատիվների արժանացրեց, «մեծացոյց գնա քան զամենայն պատրիկսն, որ էին ի թադաւորութեան նորա»⁴², - դրում է Սերեոսը: Երբ կայսեր զորապետ Թուման

38 Denys de Tell Mahre, p. 6-7.

39 Հ. Մ ա ն ա ն դ յ ա ն. Երկեր, Հ. Բ, էջ 528:

40 Ղ և ո ն դ, էջ 8: Այս ընդհարումը դրվում է նաև Դվինի առաջին գրավումից 2-3 տարի առաջ (տե՛ս Հ. Հ ա մ բ ա ը յ ա ն. Հայք արաբացվոց իշխանության տակ. Ժամանակադրական խնդիրներ Սերեոսեն. - «Հուշարձան», էջ 244), ինչն, իհարկե, չի հաստատվում սկզբնաղբյուրներով:

41 Տե՛ս Է. Դ ա ն ի ե լ յ ա ն. Հայաստանի քաղաքական պատմությունը, էջ 162:

42 Ս ե բ ե ո ս, էջ 132:

Ատրպատականի իշխանից⁴³ մեծ կաշառք ստանալով կալանեց թեոդորոս Ռչտունուն և կապանքների մեջ դրած ուղարկեց Կ. Պոլիս, կայսրը ոչ միայն ազատ արձակեց թեոդորոս Ռչտունուն, այլև պատիվներից զրկեց թուժային: Բնականաբար, կայսրը կկամենար Հայաստանը տեսնել ոչ թե Ատրպատականի իշխանի, այլ Բյուզանդիայի դերակայություն տակ: Նա երկյուղում էր նաև, որ Հայ նախարարները կարող են հակվել արաբների կողմը, ուստի երբ Վարազտիրոց Բադրատունին անսպասելիորեն հեռացավ Տայք նահանգ, Կոստաս II կայսրը Հայաստանում տեղակայված բյուզանդական զորքի հրամանատարին կարգադրեց «ունել զամենայն անցս ճանապարհացն», հավանաբար, արաբների հետ Վարազտիրոցի հնարավոր շփումը կանխարգելելու, նրան կայսեր կողմը հակելու միտումով: Նույն նպատակով բյուզանդական թեոդորոս գորապետը նախարարների կամակցությունամբ Ներսես Տայեցի կաթողիկոսին ուղարկեց Վարազտիրոցի մոտ, որպեսզի նրան հանձնի «երդումն հաւատարմութեան, ի խնդրել նմա զիշխանութիւն աշխարհին»⁴⁴: Տայքը կաթողիկոսի հայրենիքն էր: Վարազտիրոցը թերևս դիմեց այնտեղ՝ Ներսես Շինողի հետ կայսրության հանդեպ քաղաքական կանխորոշ ծրագիր մշակելու միտումով: Հարկավ, կաթողիկոսը մեկնեց Տայք և Վարազտիրոցին հանձնեց երդմնագիրը: Սեբեոսը, որ հայտնի է իր քաղկեդոնամբժ մտայնությունամբ և Ներսես Տայեցու բյուզանդամետ դիրքորոշման հանդեպ բացասական վերաբերմունքով⁴⁵, դրում է, որ նշված երդմնաթղթում Վարազտիրոցը հավաստում էր, որ նվիրվածությունամբ ծառայելու է կայսրին: Պատմագիրը Վարազտիրոցի շուրթերին է դնում հետևյալ խոսքերը՝ ուղղված Կոստաս II-ին. «Ոչ ուրեք երթամ ի ծառայութենէդ ձերմէ ... կեամ և մեռանիմ ի վերայ ձերոյ աստուածապաշտութեանդ»⁴⁶: Ինչպես տեսնում ենք, շահարկվում է նաև կրոնական գործոնը, որը տվյալ պահին գորեղ կուվան կարող էր դառնալ Հայ-բյուզանդական հարաբերություններին դրական լիցք հաղորդելու համար: Կայսեր նկատմամբ հավատարմության ազդու երաշխիքներ պարունակող այդ երդմնագիրը սլետք է բացառեր Վարազտիրոցի և արաբների մերձեցման հնարավորությունը:

Արաբներն իրենց հետ պայմանագրեր կնքած այլակրոն իշխաններին ընձեռում էին որոշակի իրավունքներ, անձի և ունեցվածքի, կրոնի անձեռնմխելիություն⁴⁷, որով, ինչպես տեսանք, օժտվեցին նաև որոշ Հայ նախարարներ: Այս մասին տեղյակ լինելով, Կոստաս կայսրը հարկ է, որ

43 Ատրպատականի լեոնային շրջաններում իր անկախությունը տակավին պահպանած Մարազ իշխանը հավանաբար ջանում էր հանդես գալ իբրև Սասանյանների իրավահաջորդ և, բնականաբար, հավակնում էր նաև երբեմնի պարսկական Հայաստանի նախարարների հանդեպ տերունական իրավագործության, ինչին դիմադարձում էին Հայ իշխանները: Սեբեոսը վկայում է, որ դեռևս Վարազտիրոց Բադրատունին «ոչ նուաճեալ հնազանդեցաւ իշխանին մեծի որ յԱտրպատական աշխարհին, որում խոռոխ Որմիզդն կոչէին» (տե՛ս Ս ե բ ե ո ս, էջ 132): Ատրպատականի տերը, ինչպես կարելի է կուահել Սեբեոսի վկայությունից, կամենում էր թուժա զորապետի օգնությունամբ իր կամքը պարտադրել նաև թեոդորոս Ռչտունուն:

44 Ս ե բ ե ո ս, էջ 144:

45 R. T h o m s o n. The defence of Armenian Orthodoxy in Sebeos ("ActoΣ", Stuttgart und Leipzig, 1998, p. 329).

46 Ս ե բ ե ո ս, էջ 144:

47 A b o u J o u s o f, p. 193; B a l a d h u r i, I, p. 270–271, 275–276.

Չանար հայ նախարարներին վերապահել (կարելիություն չըջանակներում) մեծ արտոնություններ, որպեսզի ի դերև հանվեր արար զորապետների ըն-
ձեռած առանձնաչնորհումների ազդեցությունը նրանց վրա: Վերը նշված
երգմնաբերից երևում է, որ դա պատճառ էր լինելու, որպեսզի կայսրը Վա-
րազտիրոցին նշանակեր Հայոց իշխան: Հայ նախարարների բյուզանդա-
մետ դիրքորոշմանը նպաստում էր, անշուշտ, տվյալ պահին կայսրության
զորքը Հայաստանում պահպանելու հանգամանքը: Կոստաս II-ը զլացավ
646 թ. անսպասելիորեն վախճանված Վարազտիրոցի որդուն՝ Սմբատ
Բագրատունուն, շնորհել հոր (Հայոց իշխանի) պաշտոնը: Սերեոսը դրում
է, որ կայսրը Սմբատին կարգեց «ի պատիւ հաւր իւրոյ. տուեալ նմա զիշ-
խանութիւնն ընիկ տանուտէրութեանն ասպետութեան»⁴⁸:

Սերեոսի հազորգած տեղեկությունների լույսի տակ հնարավոր է
դառնում պարզել տվյալ ժամանակամիջոցում Հայաստանում ծավալված
իրադարձությունների հաջորդականությունը: Պատմագրի վկայություններ
Կոստաս II-ի դահակալման առաջին տարում (641 թ.) նրա զորապետ Թեո-
դորոսն ուղարկվեց Հայաստան և այնտեղ մնաց կարճատև ժամանակ: Այս
զորապետի օրոք Վարազտիրոցի որդի Սմբատը նորընծա կայսեր կողմից
արժանացավ սպաթարի ու կանդիգատի պատվաստիճանների: Այս մասին
Սերեոսի վկայությանը հետևում է նրա հետևյալ հաղորդումը. կայսրը
Սմբատին «անդէն կարգեաց ի կարգն առաջի յամին հինգերորդի թագաւո-
րութեան իւրոյ»⁴⁹, իմա՝ 646 թ.: Սյս վկայություններից երևում է, որ
կայսրը երկիցս (մեկը՝ 641, մյուսը՝ 646 թթ.) պատիվներ է շնորհել Սմբատ
Բագրատունուն: Պատմագրի «ի կարգն առաջի» արտահայտությունը հա-
մանաչանակ է տոհմապետի (տանուտերություն) պաշտոնին, որն, ինչպես
տեսանք, հոր մահվանից հետո կայսեր կամքով վերապահվեց Սմբատին:

Ի՞նչը կայսրին դրդեց երկրորդ անգամ պատիվներ շնորհել Սմբատ
Բագրատունուն: Նրա այդ քայլն ուներ, անշուշտ, ազդու դրդապատճառ-
ներ: Սմբատին Հայոց իշխանի պաշտոն չշնորհվեց, քանի որ վերջինիս հա-
մար կար ավելի կարողունակ և հեղինակավոր թեկնածու՝ Թեոդորոս
Ռչտունին, որը նախկինում (մինչև արաբական արշավանքները) վարել էր
այդ պաշտոնը և այժմ դիմադիր դիրքորոշում ուներ արաբների հանդեպ,
ուստի նա կայսեր կամքով «կարգեցաւ ի նոյն իշխանութեան», գրում է
Սերեոսը⁵⁰: Սնշուշտ, Սմբատ Բագրատունին կարող էր իրեն համարել հոր
բնական հաջորդը նաև Հայոց իշխանի պաշտոնում: Հավանորեն այս հան-
դամանքը նկատի առնելով, կայսրը երկրորդ անգամ (երբ Թեոդորոս
Ռչտունուն կարգեց Հայոց իշխան) Սմբատին օժտեց պատվատիրոսնե-

48 Ս ե բ ո ս, էջ 144: Գ. Աբգարյանի կարծիքով Սերեոսի նշած «տանուտէրու-
թեան» արտահայտությունը «հատուկ պաշտոնի անուն է», որից երևում է, որ պատմիչի
ապրած ժամանակ եղել է Հայոց այրուձիու «ընդհանուր հրամանատարի պաշտոն» (տես
Ս ե բ ո ս, էջ 312, ծան. 507): Սակայն պատմագիրն այստեղ նկատի ունի Բագրա-
տունյաց տոհմի տանուտերության իրավունքը (Հ Մ ա ն ա ն գ յ ա ն. Երկեր, հ. Բ, էջ
541):

49 Ս ե բ ո ս, էջ 143:

50 Ս ե բ ո ս, էջ 145: Այս արտահայտության տակ մատենագիրն ի նկատի ունի
Թեոդորոս Ռչտունու կողմից նախկինում վարած Հայոց իշխանի պաշտոնը: Սյլ առիթով
Սերեոսը գրում է, որ մինչև այս գեպքերը Թեոդորոս Ռչտունին «էր իշխան աշխարհիս
Հայոց» (նույն տեղում, էջ 142):

րով: Դա, ինչպես տեսանք, տեղի ունեցավ 646 թ.: Կայսրը նպատակ ուներ Սմբատին պահել մայրաքաղաքում⁵¹, թերևս թեոդորոս Ռչտունու հետ նրա գժտվելը կանխելու նպատակով:

Սեբեոսի հետագա շարադրանքից երևում է, որ հաջորդ տարի, իմա՝ 647 թ., արաբները վերստին արշավեցին Հայաստան, այս անգամ Ատրպատական ներխուժելուց հետո, ինչը թույլ է տալիս ենթադրելու, որ նրանք ունեին նաև «մարաց իշխանի» անկախությունը վերացնելու նպատակ: Արաբական զորքը, բաժանվելով երեք զորախմբերի, արշավեց հետևյալ ուղղություններով.

- ա) դեպի Այրարատ,
- բ) Սեպհական դնդի կողմերը (Վասպուրական),
- գ) դեպի Աղվանք⁵²:

Համաձայն Ղևոնդի հաղորդման, արաբները «հասին ի սահմանս Հայոց՝ յերիս բաժանեալ առաջս՝ սփոեցան յասպատակս իւրեանց: Առաջ մի հատեալ ընդ կողմն Վասպուրական աշխարհին՝ առին զաւանս և զամրոցս որ մինչև ի Նախջաւան քաղաք և առաջ մի ընդ կողմն Տարօնոյ: Եւ միւս առաջն հասեալ ի Կողովիտ՝ պաշարէին զամրոցն Արծափայ»⁵³:

Այսպիսով, ըստ Ղևոնդի, Հայաստան թափանցած արաբական զորքը շարժվել է երեք ուղղությամբ՝

- ա) դեպի Վասպուրական,
- բ) դեպի Տարոն,
- գ) դեպի Կողովիտ (Այրարատ):

Ինչպես տեսնում ենք, Ղևոնդը չի հիշում Աղվանքի կողմերը շարժվող զորախումբը և խոսում է միայն Հայաստանում ծավալված դեպքերի մասին: Անշուշտ, տվյալ դեպքում Սեբեոսի ուշադրությունը նույնպես առաջին հերթին պետք է զրավեին Հայաստանում ընթացող իրադարձությունները: Ուստի Սեբեոսի մոտ նշված երրորդ նպատակակետը՝ պետք է չինի ոչ թե Աղվանքը, այլ Տարոնը: Դրա համար հիմնավոր կովան կարող է ծառայել պատմադրի մեկ այլ հաղորդումը, որի համաձայն «այն զաւրն, որ ի կողմանս Այրարատեան, եհար սրով մինչև ի կողմանս Տայոց, Վրաց և Աղուանից»⁵⁴: Այս վկայությունից երևում է, որ դեպի Աղվանք է արշավել արաբական առաջին՝ Այրարատ ներխուժած զորախումբը: Ն. Ակինյանը Սեբեոսի «առաջի մի յԱղուանս» ընթերցվածը սրբագրում է «յառաջ մի ի Նախջաւան, ձեով»⁵⁵: Սակայն թե՛ Սեբեոսի և թե՛ Ղևոնդի հաղորդումները հիմք չեն տալիս նման սրբագրման համար: Վերևում նշվեց, որ ըստ Ղևոնդի տեղեկության, Վասպուրական խուժած զորքը հասել է մինչև Նախճավան: Իսկ Սեբեոսի մոտ կարդում ենք. «Այն զաւրն, որ ի կողմանս Այրարատեան, եհար սրով մինչև ի կողմանս Տայոց, Վրաց և Աղուանից, առ զաւար և զգերութիւն և եկն էանց ի Նախճաւան առ այն

51 Հետագայում Կոստաս II-ը Սմբատին նշանակեց «իշխան զաւրու թրակացոց իշխանացն» (Ս ե բ ե ո ս, էջ 163):

52 Ս ե բ ե ո ս, էջ 145:

53 Ղ և ո ն դ, էջ 11:

54 Ս ե բ ե ո ս, էջ 146:

55 Տե՛ս «Հանդես ամսօրյա», 1969, էջ 350:

զաւր, որ մարտ եղեալ կուռէին ընդ բերգին Նախճաւանի»⁵⁶: Այս հաղորդումից երևում է, որ մինչև Աղվանք շարժվող արաբական զորքի Նախճաւան հասնելը, վերջինս արգեն պաշարված էր արաբական մեկ այլ զորաբաժնի կողմից, որը, ինչպես տեսանք, Վասպուրական ներխուժած զորախմբի միավորումներից մեկն էր: Խուճը շարժվեց նաև Երևանի վրա, որը հեռու չէր Նախճաւանից: Վասպուրական թափանցած զորքը հարկ է, որ գրավեր նրա կենտրոններից մեկը համարվող Նախճաւանը, որը Բելագուրին համարում է «Վասպուրական նահանգի մայրաքաղաք»⁵⁷:

Սեբեոսի վկայութեամբ Սեպհական զնգի (Վասպուրականի) կողմերն արշավող զորքը «հարեալ զամենայն կողմանսն զայնոսիկ սրով սուսերի, առին զաւար և զգերութիւն: Եւ եկին ժողովեցան ի Հէրևան և մարտեան ընդ բերգին, և ոչ կարացին առնուլ»⁵⁸:

Պատմագրի այս հաղորդումը տեղիք է տվել տարամերժ ենթագրություններին⁵⁹: Անշուշտ, հավանական կարելի է համարել Հովհաննես Դրասխանակերտցու մի վկայությունը, որտեղ ասվում է. «Յայնմ ժամանակի ասեն լինել զկուրին որ ի քաղաքագիւղն Երեւանի, զոր և բաւական քեզ ուսուցանեն զայնր պատերազմի զհանգամանս, որ նախ քան զմեզ զնա պատմագրեցին»⁶⁰: Ինչպես տեսնում ենք, պատմագիրը վկայում է, որ խնդրահարույց եղելութեան մասին իրենից առաջ գրել են ուրիշ պատմագիրներ, որոնց մեջ, անշուշտ, նա նկատի ունի առաջին հերթին Սեբեոսին: Սամվել Անեցին 660 թվականի տակ հիշում է. «Երեւանու կուրին, յորում զգիրարդն դոցես՝ առ պատմագրութիւնս առաջնոցն. Շապուհ և Ասողիկ յիշեն»⁶¹: Մեջբերված այս վկայությունը եթե համարվի ընդունելի ու արժանահավատ, ապա կարելի է ենթադրել, որ բացի Սեբեոսի մոտ վկայվածից, արաբները Երևանի դեմ կուրվներ են մղել նաև հետագայում⁶², ջանալով ջնջել իրենց պարտությունը հետքերը:

56 Սեբեոս, էջ 146:

57 B a l ā d h u r i, I, p. 307.

58 Սեբեոս, էջ 145:

59 Դեռևս Հ. Շահխաթունյանը «Հէրևան»-ը տեղորոշում էր Կոգովիտում (տե՛ս Հ. Շահխաթունյան. Ստորագրութիւն կաթողիկէ էջմիածնի և հինգ զաւառացն Արարատայ. հ. Բ, էջմիածին, 1842, էջ 134: Թ. Ավդալբեղյանը «Հէրևանը» տեղադրում է Վասպուրականի Առեստ ավանում (տե՛ս նրա. Հայագիտական հետազոտություններ. Երևան, 1969, էջ 146-147): Հ. Մանանդյանը «Հէրևանը» համարում է «Հերաւան» տեղանվան աղճատված ձևը (Հ. Մանանդյան. Երկեր. հ. Ե, Երևան, 1984, էջ 173): Գ. Աբգարյանն առաջարկում է «Հէրևան»-ն ընթերցել «Հեր և անդ» ձևով (Գ. Աբգարյան. «Երևանի» բերդի հնագույն հիշատակությունը. — «Լրաբեր հաս. գիտ.», 1972, № 8, էջ 30): Է. Դանիելյանը «Հէրևան»-ը նույնացնում է Հարք գավառի Հերեան գյուղի հետ (տե՛ս է. Դանիելյան. 647 թ. արաբական արշավանքը Հայաստան. — ՊԲՀ, 1982, № 2, էջ 114: Ն ու յ ն ի Հայաստանի քաղաքական պատմություն..., էջ 176): Սակայն որևէ տեղ չի նշված, որ այս գյուղն ունեցել է բերգ, մինչդեռ ըստ Սեբեոսի «Հէրևան»-ը ունեւր ամրակուռ բերդ, որը արաբները չկարողացան գրավել:

60 Յովհաննու կաթողիկոսի Դրասխանակերտցոյ Պատմութիւն Հայոց. Թիֆլիս, 1912, էջ 92:

61 Սամուէլի քահանայի Անեցոյ Հաւաքմունք ի գրոց պատմադրաց. աշխ. Ա. Տէր-Միքելեանի. Վաղարշապատ, 1893, էջ 83:

62 Ղ. Ալիշանը կարծում է, որ Երևանի դեմ արաբների երկրորդ հարձակումը տեղի է ունեցել 658 թ. (Ղ. Ալիշան. Այրարատ, էջ 299-300): Թ. Հակոբյանն այն գնում է 660 կամ 658 թվականին (տե՛ս Թ. Խ. Հակոբյան. Երևանի պատմությունը. Երևան, 1969, էջ 198):

Երևանի տակ արաբների կրած պարտությունն ինքնին ապացույց է նրանց զորքի սակավաթվություն: Երևանը, որքան էլ այն ամրանիստ լիներ, չէր կարող դիմանալ արաբական միացյալ զորուժի գրոհներին: Պետք է կարծել, որ Երևանի տակ 647 թ. կռիվներ է մղել Վասսուրական մտած արաբական զորախմբի միավորումներից մեկը: Արաբների հետագա գործողությունները ցույց են տալիս, որ նրանք իրենց ուժերը բաշխել են մի քանի ուղղությունների վրա՝ երկրին արագ տիրանալու միտումով: Բացի այդ, կենտրոնացված դիմագրություն բացակայությունը նրանց հնարավորություն էր ընձեռում փոքր զորասյուներով հասնել Հաջողության: Դանաե հաղթանակի որոշ հնարավորություն էր տալիս հայերին: Սեբեոսի ուշագրավ մի վկայության համաձայն «Հէրևան»-ի տակ անհաջողություն կրելուց հետո արաբները «եկին ի Որդսսուու և ոչ նմա ինչ կարացին առնել»: Պատմիչը չի նշում, թե արաբները որտեղից են շարժվել Որդսսուու: Մինչդեռ Արծափի գրավման մասին պատմելիս նա հիշում է, որ այն իրականացրել են Որդսսուուի դեմ մարտնչած զորականները, որոնք «գնացին անտի (Որդսսուուից – Վ. Վ.) և բանակեցան յԱրծափս»⁶³: Որդսսուուն չի հիշվում ուրիշ մատենագիրների կողմից, ուստի դժվարանում է նրա տեղորոշումը⁶⁴: Սեբեոսի վկայությունը թույլ է տալիս ենթադրել, որ այն Արծափից հեռու չսլետք է դտնվեր, ուստի արաբներն ուրիշ զորամաս չենտեցին Արծափի դեմ: Պատմագիրը նշում է, որ Արծափի վրա հարձակված արաբական զորքի թիվը մոտ երեք հազար էր: Նրան պարտության մատնեց Թեոդորոս Ռշտունին՝ ազատելով Հայ գերիներին⁶⁵: Այս հաղթանակի շնորհիվ արաբները երկու տարի դադարեցին իրենց ասպատակությունները Հայաստանում⁶⁶:

ПОЗИЦИЯ, ЗАНЯТАЯ АРМЯНСКИМИ НАХАРАРАМИ В ПЕРИОД ПЕРВЫХ АРАБСКИХ НАШЕСТВИЙ

ВРЕЖ ВАРДАНИЯ

Р е з ю м е

В 640-е годы в период арабских нашествий в Армению и приграничные области Византии появились определенные условия для военно-политического союза между Византией и Арменией, чему способствовала политика императора Геракла (610-641). Его преемники придерживались того же политического курса в отношении правителей Армении – Варазтироца Багратуни, Давида Сааруни и Теодороса Рштуни. Арабы вначале вторглись в Четвертую Армению, они завладели также персидской частью Армении. Военачальником Персид-

63 Ս Ե Բ Ե Ռ Ս, էջ 145:

64 Հ. Մանանդյանն այն տեղադրում է Բերկրիի ձորից, ապա խոյից Կոզովիտ ձգվող ճանապարհների միացման վայրում (գավառի հարավակողմում), այժմյան Տապարիղ գյուղի մոտ (տե՛ս Հ. Մ ա ն ա ն դ յ ա ն. Երկեր. հ. Ե, էջ 174):

65 Ս Ե Բ Ե Ռ Ս, էջ 146:

66 Ղ Լ Ն Պ, էջ 12:

ской Армении был Теодорос Рштуни, который имел персидскую ориентацию и боролся против арабских полчищ, тогда как некоторые нахарары заключали договоры с арабскими военачальниками. Арабы овладели городом Двином дважды: в 641 и в начале 650-х годов. Армянские нахарары, сохранившие внутренний суверенитет, проявляли сепаратные тенденции и не могли объединить свои усилия против завоевателей. Сообщение Себеоса о нашествии арабов (в 647 г.) в Албанию следует корректировать, ибо имеются данные того же историка, что Албанией завладела рать, вторгнувшаяся в Айрарат. Упомянутая у Себеоса крепость "hЭреван" идентична с Ереваном.